



## **KHUTBA JUMMAH**

**HADHRAT MUHYI-UD-DIN AL-KHALIFATULLAH**

**MUNIR AHMAD AZIM**

21 Juin 2019

17 Shawwal 1440 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor :

## **VALEUR LA MER DANS LE MONDE**

La mer li ene création d'Allah (swt) ki contribuer au bien-être de l'humanité. Li rempli de bane signes d'Allah pour celui ki ena la capacité et l'intelligence pou réfléchi lor so bane merveilles.

La mer li ene moyen de transport extraordinaire, li ene moyen de subsistance aussi grâce à so bane poissons, so di sel, so pureté, et so bane marées. Li ene l'univers en li-même, et li également accorde ene lémonde de bane opportunités grâce à l'exploitation de bane perles, de bane gomon, de bane minéraux etc. La mer li aussi ene grand signe d'Allah et nous ena le devoir pou réfléchi lor sa signe extraordinaire ki Allah fine donne nous là. La mer li immense et li ena bane rôles bien important ki li faire. Nous bizin apprécier so rôle en tant ki régulateur par rapport à l'atmosphère, la formation de bane nuages et le climat de la terre.

## **LA MER COUMA ENE MOYEN TRANSPORT**

Allah (swt) dire dans Quran – *Sa li ene longue verset, mais mo pou cite seulement partie kot Allah cause à propos de la mer* : « **En vérité... dans navire ki voyager lor**

**la mer chargé avec bane kitchoses ki profitables à bane dimounes... ena dans tout sa, ena bane signes pour dimounes ki réfléchi. »** (Al-Baqara 2 : 165).

**« Et parmi So bane preuves, ena bane navires [ki voyage] à travers la mer, ki ressembler à bane montagnes. »** (Ash-Shuraa 42 : 33).

Longtemps, bane dimounes ti pé fiyé zis lor la mer pour zot transport d'ene pays ou l'endroit à ene l'autre. Pas ti ena avion et donc dans so l'époque le Saint Prophète (saws) ti faire la prophécie ki zis après li, pou ena le développement de bane navires stables lor la mer.

Fine rapporter par Bukhari ki le Saint Prophète (saws) ti dire : *« Mo content pou trouve mo bane disciples voyage lor la mer (pour le Dawá), assizé dans zot navires couma bane les rois dans zot fauteuils. »*

Bane navires azordi jour transporte des centaines de tonnes de bane marchandises et zot faire sa sans gêne navigation. Quran fine décrire zot avant même zot l'apparition dans l'histoire.

**« Et c'est à Allah ki appartenir bane navires bien construits lor la mer couma bane montagnes »** (Ar-Rahman 55 : 25).

Sa c'est parski Allah ouler l'homme so faciliter et Li envie honore li lor la terre couma lor la mer aussi : **« Nous fine honore bane zenfants (garçons) Adam. Nous fine transporte zot lor la terre et lor la mer ; Nous fine donne zot bane bons kitchoses comme nourriture, et Nous fine donne zot plisse préférence lor tous Nous bane les autres créatures. »** (Bani Israël 17 : 71).

Donc la mer li utile pour l'homme pou transporte so bane marchandises et so bane matières premières ki pli lourd. Ouvert zot lizié et cherche bane signes d'Allah partout kot sa ou été. Guetter couma Allah So pouvoir grand ki avec So permission bane tonnes de fer dans bane navires zot pas couler dans de l'eau. Sa c'est ene grand grâce d'Allah.

## **LA MER COUMA ENE MOYEN DE SUBSISTANCE**

Allah (swt) fine mette dans la mer toutes sortes de poissons. Bane poissons zot bane nourritures bien sain pour l'homme. Allah (swt) dire dans Quran : **« Et c'est**

**Li [Allah] ki mette la mer à ou profit, pou donne ou ene la viande tendre, pou manger. Ou retire depuis là-dans bane ornements pou mette lor ou, et to trouve bane bateaux [navires] coupe di l'eau avec tapaze, séki permette ou alle à la recherche de So bane faveurs. Peut-être ki ou va montrer reconnaissance. »** (An-Nahl 16: 15).

Au fait nous ena le droit pour alle la pêche poissons et mange bane nourritures ki la mer accorde nous même dans l'état d'*Ihram*. Allah (swt) fine crée bane poissons comme nourritures pour bane voyageurs ki faire bane longues voyages lor la mer. (Al-Maida 5: 97).

Hazrat Muhammad (saws) fine dire ki même bane créatures morts dans la mer couma la baleine li *Halal* (licite) pou consommer. Hazrat Abu Hurayrah (ra) rapporter ki le Saint Prophète (saws) fine dire à propos la mer: « *So de l'eau li pure et tout zaimo marin ki trouvé mort li licite pou consommer.* » (Abu Dawood).

Ti ena ene incident pendant ene expédition kot bane Sahaba ti pé mort de faim, et zot fine alle trouve ene gros la baleine mort ki fine échouer lor la plage. Alors, zot fine consomme sa pendant ene quinzaine de jours, et zot tous fine gagne ene bel part pou manger. Kan zot fine rentre la caze dans Madina, zot fine informe Hazrat Muhammad (saws) de sa, et Hazrat Muhammad (saws) fine approuve sa manger là, et li fine même demande zot pou rapporte li ene morceau pou li manger si ene boute ti rester, et effectivement bane là fine rapporte li ene morceau et li fine manger. (Bukhari, Muslim).

## LA PURETÉ DE LA MER

Ene musulman bizin prier 5 fois Namaz/ Salat par jour, dans bane l'heure différents. Donc, ti arrive ene situation kot bane Sahaba fine pose sa question là avec le Saint Prophète Hazrat Muhammad (saws) : « *Nous voyage lor la mer et nous apporte bien tiguitte de l'eau potable ki si nous servi sa, nous pou alle manquer [manque de l'eau pou boire]. Donc, eski nous capave servi de l'eau la mer pour nous faire Wudhu ?* ». Le Saint Prophète (saws) fine réponde : « *Oui, de l'eau la mer li pure.* » (Tirmidhi).

La particularité de la mer c'est ki Allah (swt) fine faire li vaste [bien grand même] et fine fer li en mouvement constant. Ena bane courants lor so surface et en

dessous de li aussi. Ena bane vagues, ena l'évaporation de so de l'eau, ena bane marées – marées haute, marée basse – et la pluie. La mer garde so pureté de par so bane mouvements.

De ce fait, bien ki la mer absorbe bane impuretés de bane dimounes, bane de l'eau ki bane habitants aussi servi et ki alle dans la mer, bane poissons morts, bane débri, etc., li toujours pure. Ena là ene leçon pour nous. Mais seulement sa pas veut dire ki consciemment nous alle polluer la mer avec toutes sortes kalités toxiques. Kan Hazrat Muhammad (saws) ti dire sa parole là, pas ti ena bane développement chimique et toxique couma nous trouver azordi jours. La mer en li-même li pure, et li vaste, mais si l'homme fer ene abus de sa pureté là et salir li dans ene façon atroce kot sa capave affecter la vie de bane dimounes et de bane créatures de la mer, alors sa de l'eau là pas pou pure. Nous bien bizin mette sa dans nous l'esprit. Allah fine donne nous tout bane zaffaires pure. C'est l'homme ki rende bane zaffaires impures par so bane actions.

## **BANE MARÉES**

Allah (swt) servi la lune pour influence bane marées. Ainsi la mer monter à ene certain niveau pour ré-dessane après 6 heures et 50 minutes environ. Ene marée haute faire bane poissons rentre dans lagon ou rapproche zot avec la terre. Ainsi bane pêcheurs zot active zot pour alle maille bane poissons selon bane marées. Et marée basse faire bane ourites rester à porter de main, ainsi ki bane huîtres lor la côte. Donc bane l'appâts couma bane huitres ou bane ourites servi pour la pêche dans marée haute. Bane poissons suive bane marées pour zot bane activités. Bane pêcheurs pose zot bane casiers kan la marée haute. Kan nous trouve la beauté de la mer, sous-marine [en bas la mer] ? C'est kan la marée fine monter, et nous capave plonger et guette bane merveilles ki Allah fine créer en bas la mer. Lor de l'eau là-haut, nous capave trouve so couleur vert vine bleu, pareil couma dans nous la vie ena bane changements aussi. Bane marées permette aussi bane pressions de bane vagues et de l'eau pour produire l'électricité, etc. En bref, *Insha-Allah* dans l'avenir nous pou capave servi l'énergie de bane vagues pour faire bane les autres avancées dans le futur.

## **DI SEL**

Parmi bane ressources ki la mer offert nous c'est di sel. Kan nous faire de l'eau la mer sec, sa donne nous du sel pour nous consommer. Di sel li ene aliment

important ki l'homme bizin dans so nourriture tous les jours. Di sel servi pou conserve bane poissons et bane la viandes aussi, et sa longtemps nous bane grand-dimounes ti pé fer sa beaucoup. Zot ti pé mette poissons et la viandes sec dans soleil avec beaucoup disel. Même azordi zour, nous contigner conserve poisson coumsa, kot nous appelle sa « poisson salé ». Bane voyageurs capave la pêche poissons en mer pou nourri zot et aussi conserve surplus de poisson ki zot fine gagner avec di sel de la mer.

## ET SI LA MER TI L'ENCRE...

Alors, nous bizin préserve la nature, ki li la mer et la terre aussi et nous fer bons et aide nous prochain. Nous bizin accepter bane difficultés de bane dimounes, aide zot, faire zot sourire, offert zot nous l'amitié et bane cadeaux et montrer zot le chemin vers Allah en montrant la grandeur d'Allah à travers So bane différents signes, et nous faire *duahs* pour zot.

Couma Allah dire dans Quran : « **Dire zot : Si la mer ti l'encre pou écrire bane paroles mo Maître, la mer ti pou épuiser avant ki tout paroles mo Maître fini écrire, même si Nous amène ene l'autre la mer pareil encore, pou aide zot.** » (Al-Kahf 18 :110).

Couma mo ti pé dire zot, la mer garde so pureté de par so bane mouvements. Nous aussi alors, nous bizin en mouvement constant dans le chemin d'Allah, dans bane voyages de *Dawa* afin pou garde la pureté de nous lé cœur, afin ki nous développe bane bons manières et l'esprit vif.

Zamais nous pas pou capave compte bane faveurs d'Allah lor nous, et surtout azordi jours dans la Manifestation Divine, kot Allah pé causer et fine élève ene So serviteur comme So Messenger élu, ene So représentant (Khalifatullah) lor la terre pour tout l'univers, alors li ene grand grâce ki Allah accorde sa humble serviteur ki li ouvert mo chemin pou mo alle fer So mission dans quatre coins du monde et Li montrer bane signes et bane faveurs extraordinaires lor sa humble serviteur et le Jamaat Ul Sahih Al Islam.

*Alhamdulillah, Summa Alhamdulillah*, nous fine retourne depuis Mayotte et Comores kot bane travaux importants et bane grands travaux fine réussi. Allah de par So grâce Li fine facilite tous mo bane travaux dans ene façon extraordinaire et Li fine ouvert plusieurs chemins pour le progrès du Jamaat Ul Sahih Al Islam.

À Mayotte, ene enthousiasme extraordinaire, ene mobilisation ki pas capave même décrire et zot fine montrer ene l'amour extraordinaire pour le Calife d'Allah et mo capave dire ki ti ena ene vibration de la joie dans sak l'heure de Namaz et nous Masjeed remplie, ki li de côté madames, zenfants et missiés. Par la grâce d'Allah, le Jamaat Ul Sahih Al Islam fine grandi encore dans bane les autres villages dans Grande Terre aussi.

Couma zot conner, nous Jamaat à Mayotte trouve à Petite Terre, avec quelques membres dans Grande Terre, mais par la grâce d'Allah avec sa visite ki mo fine faire là le Jamaat fine gagne ene très grand nombre dans le sud à Grande Terre, avec plusieurs programmes et rencontre avec plusieurs personnages. *Alhamdulillah, Summa Alhamdulillah.*

Aux Comores, dès mo descente dans avion même, ki mo même pas ti expecte sa, ene l'accueil très chaleureux de nous bane membres, accompagner de bane nouveaux membres. Lors sak membre mo fine remarque ene la joie, contentement et l'amour, façon ki zot fine accueille nous malgré ene cyclone très dur fine passe lor Comores. Le pays même dans ene situation bien bien difficile et l'agriculture fine bien affecter et beaucoup zaimo aussi fine mort et des milliers la caze fine crazer.

Mo capave dire ki par la grâce d'Allah dans région ki cyclone fine tapper bien fort, malgré ki plusieurs la caze fine crazé, pié tomber, colonne électricité tomber et péna l'électricité, mais beaucoup nous bane membres zot la caze encore là même, pas fine endommager ; pourtant zot bien pauvres, la caze en tôle et ena la paille et nous Masjid et nous l'école ki fine construire en tôle pas fine crazer. Tout fine trouve sa ene miracle d'Allah.

Nous bane membres fine déjà trouve beaucoup beaucoup miracles d'Allah même, laisse zot, mais bane les autres ki pas dans le Jamaat Ul Sahih Al Islam pour zot ki mo pé dire, zot pas fine fini exprime avec moi ki couma Allah (swt) fine protège la caze de bane dimounes ki dans mo Jamaat. Et saki miracle encore, et saki fine fer zot bien surpris, aucaine part pas ena électricité, zis dans nous Masjeed ena l'électricité, kot zot tende Azaan dans Haut-parleur, et faire Namaz en congrégation.

Aussi ti ena média ti présent le jour ki mo ti rentrer, fine pose bane questions et tous sa là fine faire Comores en entier conne le Jamaat Ul Sahih Al Islam. Malgré ena bane Mullahs ki créer beaucoup désordre là-bas, ensemble avec le tribunal islamique, mais sa fine faire bane les autres vine de l'avant et croire dans le message de sa humble serviteur là.

*Alhamdulillah*, Nous fine ouvert ene bibliothèque et fine ena beaucoup nouveaux fine rentre dans le Jamaat Ul Sahih Al Islam et kot nous fine ouvert 3 Madrassa pour l'éducation de nous bane zenfants et nous bane nouveau membres aussi capave servi le Madrassa aussi pour faire zot *Salaat-ul-Jummah* et nous construction Masjeed dans capitale de Comores, dans Itsandra (Moroni) pé faire. *Insha-Allah*, le plus grand Masjeed (du Jamaat Ul Sahih Al Islam) dans capitale de Comores, par nous bane contributions : zot contribution (dans Comores) et aussi contributions de quelques de nous bane membres dans l'Inde, ainsi ki contribution de deux sœurs à Maurice [ki pas trouve dans le Jamaat Ul Sahih Al Islam], ainsi ki moi-même et mo famille.

Le grand Masjeed (du Jamaat Ul Sahih Al Islam) depuis Mardi le 18 Juin 2019 pé construire avec ene vitesse extraordinaire et pé faire l'étage. Pour ena *Pardah* kot z'hommes pour été et kot bane madames pour été et aussi bane bureaux et pour ena *Insha-Allah*, ene bibliothèque et bane classes ki aussi pour servi pour l'éducation religieuse et académique.

*Alhamdulillah*, sa c'est tout à fait ene résumé de mo visite et travail à Mayotte et Comores. Mo pas capave raconte tous sa bane faveurs d'Allah là dans mo Khutba d'aujourd'hui. À sak fois mo trouve bane signes divines, mo pense sa révélation ki Allah (swt) ti révèle moi : **« Si le monde avec toi et Allah pas avec toi, nannié pas avec toi ; et si Allah avec toi, même personne pas avec toi, tout avec toi. »** *Alhamdulillah, Summa Alhamdulillah*, par la grâce immense d'Allah, mo pé vivre sa bane paroles divines là ki vine du ciel. ***Masha-Allah, Allahu Akbar !***